

BATISIM DAL SIGNÛR

Antifone di jentrade cf. Mt 3,16-17

A pene che Jesù al fo batiât si vierzerin i cîi
e il Spirt al restà parsore di lui come colombe
e la vôs dal Pari e disè:
Chel chi al è gno Fi il preferît,
là che o ài metude dute la mê contentece.

Si dîs Glorie a Diu.

Colete

Diu onipotent e eterni,
che daspò dal Batisim di Crist tal flum Jordan
tu lu âs proclamât a plene vôs come to Fi plui cjâr,
biel che il Spirtu Sant al vignive jù sore di lui,
dàur ai fis che tu âs adotât,
tornâts a nassi da l'aghe e dal Spirtu Sant,
di condurâ par simpri tal to bonvolê.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 40,1-5.9-11

Si pandarà la glorie dal Signôr e ogni om le viodarà.

Dal libri dal profete Isaie
«Consolait, consolait il gno popul,
al dîs il vuestri Diu.
Fevelait al cûr di Jerusalem
e contait
che la sô vore e je finide,
che la sô colpe e je scontade,
che e à vût de man dal Signôr
il dopli par ducj i siei pecjâts».
Une vôs e berle:
«Tal desert prontait
la strade dal Signôr!
Dreçait te pustote
la strade pal nestri Diu.
Ogni concje che e sedi colmade,
e ogni mont e culine che a sedin sbassadis,
il teren grumbulôs che al deventi plan
e chel di rive une concje;
alore si pandarà la glorie dal Signôr
e ogni om le viodarà;
parcè che la bocje dal Signôr e à fevelât».
Va sù suntune mont alte,
tu che tu quartis buinis gnovis in Sion!
Alce a fuart la tô vôs,
tu che tu quartis buinis gnovis in Jerusalem!
Alcile, e no sta vê pôre!
Disiur a lis citâts di Jude:
«Ve, il vuestri Diu!

Ve, il Signôr Diu
al ven indenant cun fuarce,
cul so braç lui al parone dut;
ve, al à daûrsi il so premi,
la sô pae e cor denant di lui.
Come un pastôr lui al passone il trop,
lu tire dongje cul so braç,
al puarte i agneluts sul pet,
e al fâs lâ indenant biel planc lis pioris che a dan di lat».
Peraule di Diu.

SALM RESPONSORIÂL dal Salm 103

R. Benedet il Signôr che al regale la vite.

Tu sês propit grant, Signôr, gno Diu!
Sflandôr e maiestât al è il to vistît,
invuluçât di lûs tant che di une manteline.
Lui al plante i cîi tant che une tende. **R.**

Al fâs sù lis sôs stanziis parsore des aghis;
al fâs il so cjar cui nûi,
su lis alis dal vint al cjamine;
al fâs diventâ siei mes i aiars,
siei fameis lis flamis che a saetin. **R.**

Cetantis robis che tu âs fatîs, Signôr!
E dut tu âs fat cun sapience:
la tiere e je plene incolme des tôs creaturis.
Ve il mâr, grant e larc cence spuinde;
nemâi piçui e grancj intune. **R.**

Ducj a spietin de tô bande
che tu ur dedis di mangjâ cuant che al covente.
Tu tu ur al proviodis e lôr int gjoldin;
tu spalanchis la tô man e di ogni ben si sostentin. **R.**

Tu taponis la tô muse e lôr si smamissin;
tu ur gjavis la soflade e lôr a muerin,
e tal lôr pulvin a tornin.
Tu mandis la tô soflade e lôr a vivin,
e cussi tu fasis gnove cree la face de tiere. **R.**

SECONDE LETURE Tt 2,11-14; 3,4-7

Il Signôr nus à salvâts cuntune lavade di rigjenerazion tal Spirtu Sant.

De letare di san Pauli apuestul a Tito

Benedet, e je comparide la gracie di Diu, che ur à puartade la salvece a ducj i oms e nus à insegnât a vivi in chest mont cun sintiment, cun justizie e religjon, rinunciand a la tristerie e a lis vois dal mont e spietand la sante sperance e la manifestazion de glorie dal grant Idiu e nestri salvadôr Jesù Crist, che si è dât vie dut par nô par sfrancjânus di ogni inicitât e purificâ par sè un popul che al sedi dome so e al vedi grande passion tal fâ oparis di ben.

Chestis robis tu âs di predicjâlis e tignîlis batudis, corezint cun dute la tô autoritât. Nissun nol à di olsâ a mancjâti di rispîet!

Ma cuant che e je comparide la bontât di Diu nestri salvadôr e il so amôr pai oms, lui nus à salvâts no in virtût des oparis che o varessin vudis fatîs te justizie, ma seont il so boncûr, cuntune lavade di rigjenerazion e di rinovament tal Spirtu Sant che lui al à sborfât sore di nô cence culumie midiant di

Jesù Crist nestri salvadôr, par che, justificâts cu la sô gracie, o diventassin erêts de vite eterne seont la sperance.

Peraule di Diu.

CJANT AL VANZELI cf. Lc 3,16

R. Aleluia, aleluia.

Al ven un che al è plui fuart di me, al dîs Zuan;
lui us batiarà tal Spirtu Sant e tal fûc.

R. Aleluia.

VANZELI Lc 3,15-16.21-22

Jesù al fo batiât e, biel che al stave preant, si spalancà il cîl.

Dal vanzeli seont Luche

In chê volte, il popul al jere simpri di plui in spiète e ducj si domandavin tal lôr cûr se Zuan nol fos il Messie. Alore Zuan ur rispuindè: «Jo us batii cu l'aghe, ma al ven un che al è plui fuart di me, che no mertî nancje di dispeâi la coree dai siei sandui. Lui us batiarà tal Spirtu Sant e tal fûc».

Dut il popul si faseve batiâ, e al fo batiât ancje Jesù. E biel che al stave preant, si spalancà il cîl e il Spirtu Sant al dismontà jù sore di lui in forme di un cuarp, come une colombe. E dal cîl e rivà une vôs: «Tu tu sês il gno Fi plui cjâr, in te o ài metude dute la mê contentece».

Peraule dal Signôr.

Si dîs O crôt.

Su lis ufiertis

Acete, Signôr, i regâi che ti presentin te rivelazion dal to Fi tant cjâr,
e fâs che l'ufierte dai tiei fedêi
si trasformi tal sacrifici di chel che al à volût parâ jù il pecjât dal mont
parcè che al veve dûl di nô.

Lui che al vîf e al regne tai secui dai secui.

Antifone a la comunion Zn 1,32.34

La testimoneance di Zuan e je cheste:

Jo lu ài viodût e o ài testimoneât che lui al è il Fi di Diu.

Daspò de comunion

Sostentâts cul sant regâl, Signôr,
o prein cun dute umiltât il to boncûr
di scoltâ cun fedeltât la vôs dal to Unigjenit
e di jessi clamâts e di jessi pardabon tiei fis.
Par Crist nestri Signôr.